



ՎՐԱՍՏԱՆԻ ՀԱՅՈՑ ԹԵՄԻ ՆՅՈՒԹԱԿԱՆ ՕԳՆՈՒԹՅՈՒՆԸ ՎՐԱՍՏԱՆԻ ԱՂԵՏՅԱԼՆԵՐԻՆ

Ժետրվարի 12-ին, Թբիլիսիի Վրացական ռադիոյի հայերեն հաղորդումների ժամանակ, ռադիոն անդրադարձավ ՎՐԱՑԻՆ-ՖՈՐՄ-ի հայտարարությանը, որը հրատարակված էր նույն օրվա «Սովետական Վրաստան», «Կոմունիստ», «Ջարյա Վոստոկա» և մի շարք այլ վրացերեն և ռուսերեն թերթերում՝ «Տարերքը և մարդիկ» վերնագրի տակ։ Հայտարարության մեջ հիշվում է, որ ջրհեղեղի հետևանքով, Արևմտյան Վրաստանի աղետյալներին օգնելու և պատճառված վնասների վերացմանը նպաստելու համար, աջակցում է ամբողջ երկիրը։ Հայտարարության մեջ ասվում է.

— Օգնություն ցույց տալու գործում իրենց լուծան են ներդնում նաև կրոնական թեմերի ներկայացուցիչները։ Վրացական Ուղղափառ Եկեղեցին տուժածների օգնության ֆոնդ է փոխանցում 200 հազար ռուբլի, հայտնում է Համայն Վրաստանի Կաթողիկոս-Պատրիարք Իլիա Բ-ը։ Հայոց Առաքելական Եկեղեցու կողմից 100 հազար ռուբլի է փոխանցել Վազգեն Ա կաթողիկոսը։ Մոսկվայի և Համայն Ռուսիայի Պատրիարք Պիմենը Ռուսական Ուղղափառ Եկեղեցու անունից խոր ցավակցություն է հայտնում վրաց ժողովրդին և նյութական օգնություն ցույց տալու պատրաստակամություն՝ ջրհեղեղի հետևանքները վերացնելու համար։

Ինչպես հայտնի դարձավ, Թբիլիսիի Հայոց Առաքելական Եկեղեցու թեմը նույնպես 40 հազար ռուբլի է փոխանցել տուժածների օգնության ֆոնդ։

Սույն հայտարարությունից հետո Վրաս-

տանի ռադիոն խոսք է տալիս Վրաստանի հայոց թեմի առաջնորդ գերաշնորհ Տ. Գեվորգ եպիսկոպոս Սերայդարյանին, որը ասում է.

— Մեր հայ և վրաց ժողովուրդները դարեր շարունակ ապրում են կողք-կողքի բարեկամաբար և սիրով։ Դարերի պատմության ընթացքում այս երկու ազգերը ուրախացել են մեկը մյուսի հաջողություններով և տխրել մեկը մյուսի անհաջողությունների ժամանակ ու եղբայրական ձեռք մեկնել՝ իրենց ավելի ամուր, ավելի կայուն զգալու։

Այժմ, երբ մեզ հայտնի եղավ Արևմտյան Վրաստանի, ձեզ բոլորիդ ծանոթ մեծ աղետի մասին, առաջին հերթին Հայոց կաթողիկոս Վազգեն Ա Հայրապետը արձագանքեց՝ իր ցավակցական հեռագիրը հղելով վրաց Իլիա Բ Պատրիարք-կաթողիկոսին։

Իսկ մենք որոշում ընդունեցինք օգնել աղետյալներին, և Թբիլիսիի Սուրբ Գևորգ Մայր եկեղեցին, ինչպես նաև Հավլաբարի Սուրբ Էջմիածին եկեղեցին օգնության ֆոնդին հատկացրին 20-հազարական ռուբլի, ընդամենը 40 հազար ռուբլի։

Մեզ հայտնի է, որ մեր ժողովուրդը ևս շարունակում է նյութական օգնություն ցուցաբերել իրենց անձնական միջոցներից։

Որպես նաև և քաջալերում եմ մեր ժողովրդին, որը, եղբայրական մյուս ժողովուրդների հետ միասին, այս մեծ փորձության պահին ցուցաբերեց իր արիությունը և զոհողությունը՝ եղբայրական ձեռք մեկնելով վրաց ժողովրդին՝ ի նշան հավիտենական անկեղծ բարեկամության։